



DEKRETUA

IRUZUR FISKALAREN KONTRAKO PLANAREN IRIZPIDE OROKORRAK

Diru-sarrerak areagotzen laguntzen duten hainbat jarduera bideratzen ditu Udal Ogasunak bere prozesu arruntetan, bai likidazioari dagokionez, bai diru-bilketaren kudeaketari dagokionez.

Ekintza zehatzak jaso nahi dira orain jarduera-plan batean —zein efikazia- eta efizientzia-helburuen mende egongo baitira—, udal-zerbitzuen eguneroko kudeaketatik harago joateko aukera izan dadin, eta zerga-kontrolaren, diru-bilketako jardueraren eta udal-ikuskaritzaren urteko planetatik haraindi, horiek plan integral batean bilduz, gauzatzeko behar diren baliabideekin batera.

Hainbat jarduera-ildotan egituratzen da Iruzur Fiskalaren kontrako Plana (2021-2023): zerga-betebeharrak betetzen diren kontrolatzea; zerga- eta bilketa-prozeduren hobekuntza eta eraginkortasuna bultzatzea; beste administrazio batzuekiko lankidetzeta eta sailen arteko koordinazioa, eta zergadunei arreta emateko zerbitzuak hobetzea.

Jarduerak hainbat jarduera-ildotan sailkatzearen xedea da lortu nahi diren helburuen arabera ordenatzea, kontuan izanik guztiek ere efikazia-maila berarekin eragiten dutela iruzurraren kontrako borrokan.

Ondoren azaltzen dira 2021etik 2013ra bitarteko aldirako Iruzur Fiskalaren kontrako Planaren oinarri diren irizpide edo jarraibide orokorrak.



1.- Iruzur Fiskalaren kontrako Planaren irizpide orokorrak.

Informazio-prozesuak, datuen tratamendua eta tramitazio administratiboaren protokoloak hobetu beharra dago, eraginkortasun handiagoa lortzeko kudeaketan, diru-bilketan eta ikuskapenean.

Zerga-betebeharrak betetzeko erraztasunak eman behar zaizkie herritarrei, eta udal-zerga eta -tasei buruzko informazioa eskura jarri, Udalaren webgunean eskaintzen diren zerbitzu eta tramite telematikoak areagotuz.

Jarduera horiek gauzatze aldera, informazioa tratatzeko beharrezko diren garapen teknologikoak bideratuko dira, eta zergak aplikatzeko orduan inplikaturik dauden administrazio-organoen arteko koordinazio egokia baliatuko, baita beste erakunde edo entitate batzuekiko ahalik eta lankidetzarik handiena ere.

Zergapekoei informazioa eta laguntza ematea.

Teknologia berrien bitartez, funtsean, informazioa eskuratu eta zerga-zerbitzuak baliatzeko erraztasunak eman nahi zaizkio zergadunari, herritarra bere eginkizun eta ahalmenez hobeto jabetu dadin, gaiak tramitatzeko orduan modu arinagoan egiterik izan dezan, eta, bidenabar, erantzuteko denbora-tartea murriztu dadin eta, hartara, eskaintzen den zerbitzuaren kalitatea eta eraginkortasuna areagotu.

Lankidetzaren eta informazio-trukea.

Esparru horretan, lankidetzaren eta informazio-trukea sendotu eta hobetzeaz gain, informazioa biltzeko lanak areagotuko dira, kontrol-jarduerei buruzko erabakiak hartzeko eta zergadunen administrazio-kargak arintzeko beharrezkoak diren zergen inguruko datuak eskuratze aldera.

Geroko kontrola

Urte hauetan abian jarri diren kontrol-jarduerak zerga-aitorpenak erregelamendu bidez ezarritako epean aurkez daitezela bultzatu dute, eta zerga-araudia aplikatzean maiz gertatzen ziren akatsak edo irizpide okerrak zuzentzea ahalbidetu dute.



Helburuak:

- Zerga-betebeharrak norberaren borondatez bete daitezela sustatzea, zergadunari informazioa eta laguntza emanez, baita, zuzenean edo zeharka, helburu horretara bideratutako beste edozein zerbitzu ere.
- Udalak bere eginkizunak betetzeko bideratzen dituen jarduerak zerga-betebeharrak betetzeko beharrezko diren eskakizun formalen ondoriozko zeharkako kostuak murrizten dituztela bermatzea.
- Beste administrazio publiko batzuekin lankidetzan aritzea, zergen arloko ez-betetzeak detektatu eta erregularizatzeko.

2.- Jarduteko irizpide edo jarraibideak, zergaz zerga.

Ondasun higiezinaren gaineko zerga

Aurreko urteetan bezala, zergen hobariak jasotzeko eskakizun formal eta materialak egiaztatuzko lanarekin jarraituko da, eta, horrenbestez, salbuespenak ofizioz onartu zireneko baldintzek bere horretan dirauten egiaztatuko da, baita galdatutako salbuespen eta hobariak emateko betebeharrak ere.

Beste zerga batzuk —bereziki, eraikuntza, instalazio eta obren gaineko zerga eta ekonomia-jardueren gaineko zerga eta tasak— egiaztatu edo ikertzearen ondorioz atzematen diren zerga-egoerak berrikusiko dira.

Ekonomia-jardueren gaineko zerga

Zerga honen funtsezko aldagaiak, oro har, negozio-zifra, azalera eta instalatutako potentzia dira, eta bolumen ekonomikoari, lokalen tamainei eta jardueraren ezaugarriei estu lotuta ageri dira hirurak ere.

Bestalde, errolda-eskumena Udalarena izaki —Arabako Foru Aldundiak eskuordetuta—, zergadunak egiten dituen jardueren kalifikazioa berrikusi beharra dago, eta zergaren tarifetan eta horiek aplikatzeko jarraibidean xedatutakoarekin kontrastatu beharra.

Hortaz, hauek izango dira jarduteko irizpideak ekonomia-jardueren zergari dagokionez:

- Berraztertu egingo da eraikuntza, instalazio eta obren gaineko zergen eta ekonomia-jardueren gaineko zergen nahiz tasetan egiaztatu edo ikertzen diren



zergadunen egoera, horien jarduerak agerian uzten dituelarik ekonomia-jardueren gaineko zergan zehazten den ahalmen ekonomikoa eta negozio-zifra —bai alta-egoerari dagokionez, bai kuota zehazteko parametroei dagokienez; nagusiki, jarduerari atxikitako lokalen azalera eta negozio-zifra—.

- Informazio-ustiapenak egingo dira, zergapekoen matrikula Merkataritza Erregistroan oinarritzen diren datu-baseetako informazioarekin gurutzatuz, milioi bat eurotik gorako negozio-zifrak dituzten eta ekonomia jardueren gaineko zergaren matrikulan ageri ez diren enpresak detektatzeko.
- Zergapekoen matrikulari dagokionez, zehazten diren konparazio-aldagaien arabera azalera zuzenari —edo beste zerga-elementu batzuei, hala nola instalatutako potentziari edo besteri— dagokion zerga ordaintzen ari ez diren jarduerak aztertuko dira.
- Informazio-ustiapenak egingo dira —salbuetsitako enpresen matrikulatik abiatuta— negozio-zifraren edo jarduera-hasieraren ondoriozko salbuespena bidezko den egiaztatzeko.
- Zergadunek egindako jardueren kalifikazioa kontrolatzea.

Eraikuntza, instalazio eta obren gaineko zerga

Zerga horretan jarduerak planifikatu, hautatu eta kargatzeko irizpideak zergaren izaerak zehazten ditu, zeinen elementu nagusia instalazio, eraikuntza eta obraren kostua baita; beraz, aldagai hori kontuan hartu beharra dago jarduera planifikatzean, kontribuzio-ahalmenaren printzipioaren funtsezko adierazgarri gisa.

Ondorioz, zerga horren inguruko jarduera-irizpideak hauek izango dira:

- Lizentziei eta erantzukizunpeko adierazpenei dagozkien obren benetako kostu erreala egiaztatuko da.
- Hobari fiskalak aplikatzeko baldintzak betetzen diren egiaztatuko da, obraren onura motaren eta zer-nolakoen arabera hautatuz jarduerak.

Hiri-lurren balio-gehikuntzaren gaineko zerga

Zerga horretako jardueren plangintza eta hautaketa, funtsean, higiezinaren eskualdaketei dagokienez eskuragarri dauden informazio-iturriek baldintzatzen dute. Notarioek bidaltzen dituzten zerrendak ustiatzea da lehentasunetako bat.



Jabari publiko lokalaren erabilera pribatibo edo aprobetxamendu bereziaren tasak

Jabari publikoaren aprobetxamenduaren hainbat modalitate sartzen dira atal honen barruan: hesiak eta aldamiok, ibilgailu-pasabideak, espazio-erreserbak, mahaitxoak eta beste. Orobat sartzen da atal honetan hornidura-zerbitzuak ustiatzen dituzten enpresen aprobetxamenduak zergapetzen dituzten tasen erregulazioa.

3.- Jarduera-irizpide orokorrak, diru-bilketaren kudeaketan

Udalak ordaintzeke dauden zuzenbide publikoko zorrak kobratzeko duen gaitasunaren mende dago zerga-sistemaren zuzentasunaren pertzepzioa.

Hortaz, hauek izango dira jarraibideak:

- Zerga-betebeharrak betetzeko erraztasunak eman behar zaizkie herritarrei, eta betebeharraren egoerari buruzko informazioa eskura jarri, Udalaren webgunean eskaintzen diren zerbitzu eta tramite telematikoak areagotuz. Horrek berekin ekarriko luke zorren egoera kontsultatzeko eta joan-etorriak egin beharrik gabe ordaintzeko behar diren garapen informatikoak gauzatzea.
- Zerga-betebeharrak betetzea errazteko ordainbideak sustatzea, banku-helbideratzeak areagotuz zergak ordaintzeko metodo gisa, eta, bereziki, ordainketak epeka helbideratzea eta tarifa fiskal laua.
- Zerga-zorrak zatikatu eta atzeratzeko dossierretako tramiteak sinplifikatu, zatikapen horiek bide telematikoaz eskatzeko aukera ematen delarik.
- Prozedurak mekanizatzeko behar diren informatika-garapenak eskatu behar dira, kudeaketa arintzen lagunduko baitute, eta pertsonal-baliabideak kobratze-lanetarako baliatzeko aukera emango; ezinbestekoa izaki hori, zorra kobratu eta iruzurra saihesteko.
- Zordunen ondasun eta eskubide ezagunak —kontu korranteetako dirua, berehalakoan edo epe laburrean gauza daitezkeen kredituak, ordainsari eta soldatak eta beste— bahitzeko zuzemenak areagotzea.
- Konkurtso-prozesuek eragindako zorren kudeaketan tramitazioa bizkortzea —kontuan izanik prozesu judizial baten barruan egiten dela—, beti ere ordaindu gabeko kredituaren parterik handiena kobratze aldera.

- Administrazioen arteko harremanak areagotzea, erakunde bakoitzak duen informazioa trukatzeari dagokionez ahalik eta lankidetzeta-mailarik handiena lortzeko, indarrean dagoen lege-esparruaren barruan.

Ikusirik Arabako Zergei buruzko Foru Arau Orokorraren 112. artikulua,

Ogasun Saileko zinegotzi ordezkariak, Tokiko Gobernu Batzarrak 2019ko ekainaren 21eko erabakiaren bitartez bere gain utzitako ahalmenaz baliatuz, hau

EBATZI DU:

2021etik 2013ra bitarteko aldirako Iruzur Fiskalaren kontrako Planaren oinarri diren irizpideak —dekretu honetan jasotakoak— onestea.

Vitoria-Gasteizen, 2020ko abenduaren 22an.

A handwritten signature in black ink, appearing to read 'Iñaki Gurtubai Artetxe'. The signature is stylized with large loops and a long horizontal stroke.

Izp.: Iñaki Gurtubai Artetxe
OGASUN SAILEKO ZINEGOTZI ORDEZKARIA